

КАМОЛИДДИНГА

Кенжа фарзанд оиланинг боли эмиш,
Ака, опа — барчасининг эли эмиш.
Отасига, онасига балогардон,
Иккаласин юрагининг ёли эмиш.

Камолиддин, ўғлим, бу кун «бузғич»имсан,
Гарчи кенжам, аммо-лекии «тунғич»имсан.
Бир кун келиб белларимдан қувват кетар,
О, ўшанда куч-қўримсан, ўзғичимсан.

Бир олис гап: яралибди дунёи дун,
Кимки агар оиласин билса қадрин,
Иморатнинг таянч-пойдор устунидек
Қўтаргайдир ўша Ватан, Миллат қадрин!

2000 йил
Азим Суюннинг
Муҳаббат Ҳайратлари китобидан

ТЕРАКЛАР

Ай, кўм-кўк тераклар, хур-хур тераклар,
Кўча бўйларида қоматингиз тик.
Нақадар гўзалсиз — шилдирар барглар,
Қошингизда бошқа дарахт паст, эгик.

Ай, кўкиш тераклар, эртак тераклар,
Сойлар кирғоғида — тенги йук чирой.
Бахтлидир — сизни қай бир қуш дараклар,
Тунлар қўниб турар шохингизга ой.

Ай, зумрад тераклар, сулув тераклар,
Торлар қучоғида эркаланасиз.
Белингизни боғлар нур-камалаклар,
Тароқшойи кийган малак — бекасиз.

Ай, ўзбак тераклар, сирдош тераклар,
Баррингизга суюк сўзим битганман.
Сизни ҳеч ким йўқлаб келмай қўйса гар,
Билинг, дунёдан мен — Азим ўтганман.

2000 йил
Азим Суюннинг
Муҳаббат Ҳайратлари китобидан